

e 74 nga tangata i mate, ko nga whare karakia pakaru katoa. Tenei ake ano te nuinga o nga tupapaku. Ko etahi o nga taone i monga-monga noa i te hau. Katahi te whenua whakarihariha. — I etahi hoia e mahi ana i tetahi o nga pa tiaki o Poneke i te Mahanga ka paku te pu katene, e toru nga tangata i mate rawa, ko etahi i whara. Ko tetahi nui noa atu nga ra i takoto ai i te hohipera katahi ano ka hoki mai nga whakaaro. Nui atu te tangata i hui ki te tanumanga.

Kotahi mano nga tangata i hui ki Tamutu, te Waipounamu, ki te tangi ki a Haapa Taiaroa, he tamaiti na te Honore W. K. Taiaroa, o te Whare o Runga. I mate mai a Haapa ki Wharekauri, e kiia ana naana ano ia i pupuhi ki te pu; i hahua mai a mauria mai ana ki Tamutu nehu ai. He tino tangata a Haapa e mohiotia ana ki Heretaunga ka ahua whakarunga atu. E te hoa kino ana, whakaaro ana tou matenga.

I kohurutia tetahi pakeha ki Niutaone, Poneke, ko Whakuha tona ingoa. Kua whakapaea te tangata me te wahine o te whare i noho ai taua tangata. I mohiotia i haurangi au tangata, no te po ka rongoa atu e etahi, e riri ana, no te ata ka kitea a Whakuha kua mate i roto i tetahi o nga ruma. — I kai waipiro nga heramana tokotoru o tetahi kaipuke i Poneke, a te tino haurangitanga. Ka tata tonu te rere to ratou kaipuke, ka hoki ki te wapu; rokohanga atu e mahi ana tetahi o nga heramana he Kariki, i tana mahi, kaore ona haurangi, he tangata rangimarie. Katahi ka pokea te Kariki e nga haurangi nei, ko tona rerenga ki te kokonga o te tima tu ai, me te whakatupato ano i nga haurangi, otira kaore i rongo, rere tonu atu ki te patu i ta ratou tangata. Ko te maunga o te Kariki nei ki te oka, ka tapatapahia nga tangata haurangi nei, tokotoru kei te hohipera e takoto ana inaianei. I te whakawakanga ka ki te kapene me te mete, mehemea ko raua taua Kariki ka mau ano raua ki te oka, i te kawenga a te hemanawa, a te mate. Koia nei etahi o nga hua o te waipiro, he whakarite i te tangata i hangaia nei kia rite ki te Atua te ahua, kia rite ki te rewera.

Kua tae mai te whakaatu o te matenga o Timi Rana, he rangatira no Heretaunga; o Hori Te Roi o Te Whakaki, Wairoa, he kau-matua i u tonu ki te pupuri i te whakapono, i arai hoki i nga mahi poropiti teka; o Te Hapi-mana Tunupaura, he tino rangatira no te Wairoa, he tangata marae, he kai-tautoko i nga mahi o te whakapono. No te 23 o Akuhata ka mate a Rihara Turi ('Bob' Jury) ki Wairarapa: e pouri ana matou mo te hoa. Tera e tangi nga tamariki o Te Aute i mohio kia ia i Te Aute, he tangata pai, haangu, mateoha. He maha ano nga whakaatu kua kite

matou mo nga tangata kua tupapakutia i roto i te hara, ahakoa kei te titiro tonu nga kanohi. Katahi ano te parekura whakaharahara, mo konei ia nga tangihanga nunui. Otira kei te mohio matou kei te tangi nga anahera o te rangi, kei te whakamoemiti nga toa o te reinga o te pouritanga.

RONGOMAITAWHITI.

Kua mate te pouaru tino rangatira atu o te ao nei. I puta mai ki a ia, ia ra, ia ra, £1500. E £20,000,000 ona moni i wiria iho e ia mo nga mahi aroha, ko te toenga ki ona whanaunga. Tona ingoa ko Baroness Maurice Hirsch. "Kahore hoki he mea i mauria mai e tatou ki te ao, a he mea marama noa tenei e kore e ahei te mau atu e tatou tetahi mea."

Kua tata tonu te riri a Ingarangi me Taranawara; kei te whakariterite nga taha e rua mo te whawhai. Kua haere mai nga hoia o Ingarangi, e haere ana hoki etahi hoia o Ahitereiria Hei te whawhaitanga pea haere ai etahi o Niu Tirenenei. Te roa o Taranawara e 700 maero te whanui e 400; e tata ana taua whenua ki Keepa Koroni, Awherika. I te whawhaitanga o taua whenua ki nga Huru, mate ana i nga Huru, na Ingarangi ka ora, otira i enei ra kanui te kino ki Ingarangi. Ko nga tangata o Ingarangi i reira, kaore he reo i te Paremete i nga mahi ranei o te Koroni. Na reira ka tonoa e Ingarangi kia rite tonu nga ture. Kaore a Taranawara i whakaae. Te ingoa o nga tangata o Taranawara he "Poa," i heke mai taua iwi i Horana, te whenua o te Tati-mana. He iwi kaha ki te riri, he karu ki te pupuhi. Tera pea a Ingarangi e raruraru i te tuatahi, hei a ia ano ia te papa i te mutunga.

"God save the Queen."

Hei tera nama nga korero o te whakawakanga o Tereiwahu—te tangata tino rongonui atu i te ao inaianei.

I tera Apiti i puta tetahi korero mo te pakarutanga o te Stella. I te whakawhitinga mai o taua tima i Ingarangi ki Parani, ka pa ki te toka, ka titorehia, totohu tonu atu i roto i nga meneti 15. He nui te kohu i taua ra, a e kaha ana hoki te haere a te tima. I te urunga o te wai ki roto i nga paera ka paku. E 80 nga tangata i mate, ko nga morehu i eke ki nga poti; i te tino kino o te po kotahi te poti i tahuri, a mate katoa nga tangata. I te kaipuke e heke ana ka panga e te mete tona wahine ki te moana me te poito hei whakarewa, ko ia i tu tonu ki runga i te kaipuke, ka ora tona wahine ka mate ia. Ko tetahi minita i karanga ki te Atua; ko tetahi wahine reo reka i waiata, "Rest in the Lord," (Whakawhirinaki ki a Ihowa.)